



An Bhruiséil, 4 Meitheamh 2021
(OR. en)

9142/21

**Comhad Idirinstitiúideach:
2020/0310(COD)**

**SOC 381
EMPL 283
CODEC 835**

NÓTA

ó:	Ardrúnaíocht na Comhairle
chuig:	Coiste na mBuanionadaithe/An Chomhairle
Ábhar:	Togra le haghaidh TREOIR Ó PHARLAIMINT NA hEORPA AGUS ÓN gCOMHAIRLE maidir le pá íosta leordhóthanach san Aontas Eorpach <i>- Tuarascáil ar dhul chun cinn</i>

I. RÉAMHRÁ

An 28 Deireadh Fómhair 2020, ghlac an Coimisiún togra le haghaidh Treoir maidir le pá íosta leordhóthanach san Aontas Eorpach. Is é is aidhm don togra cosaint pá íosta oibrithe a neartú trí cheanglais íosta a bhunú ar leibhéal an Aontais chun a áirithiú go socrófar an pá íosta ar leibhéal leordhóthanach agus go mbeidh rochtain ag oibrithe ar chosaint pá íosta, i bhfoirm pá íosta reachtúil nó i bhfoirm pá a shocraítear faoi chomhaontuithe comhchoiteanna mar a shainmhínítear iad chun críoch na Treorach seo.

Phléigh comhaltáí na Meithle um Cheisteanna Sóisialta (SQWP) an togra le linn aon cheann déag d'fhíschomhdhálacha neamhfhoirmiúla (ceithre cinn faoi Uachtaránacht DE agus seacht gcinn faoi Uachtaránacht PT). Ó cuireadh tús leis an bplé, chuir roinnt Ballstát i gcoinne an togra ón gCoimisiún, ós rud é, dar leo, nach bhfuil bunús bailí dlí aige, agus go háirithe go bhfuil sé ag teacht salach ar an gclásal freagrachta in Airteagal 153 (5) CFAE. Ba dhíol sásaimh do roinnt Ballstát, áfach, an tionscnamh mar chéim thábhachtach chun tosaigh chun prionsabal 6 de Cholún Eorpach na gCeart Sóisialta a bhaint amach. Níl seasamh bainte amach ag na Ballstáit eile fós ar an leibhéal náisiúnta.

Ós rud é gur ceist bhunriachtanach í ceist an bhunús dlí ó thaobh tuilleadh dul chun cinn a dhéanamh ar an togra, d'iarr Uachtaránacht DE ar Sheirbhís Dlí na Comhairle tuairim i scríbhinn a thabhairt maidir leis an mbunús dlí. Thug Seirbhís Dlí na Comhairle uaithi a tuairim an 9 Márta 2021 (6817/21).

Ar bhonn na réamhoibre a rinne Uachtaránacht DE, lean comhaltaí SQWP de scrúdú a dhéanamh ar an gcomhad faoi Uachtaránacht PT le linn seacht gcinn d'fhíschomhdhálacha neamhfhoirmiúla. Tá achoimre ar an dul chun cinn a rinneadh i Roinn II thíos.

Tá an togra comhréitigh ó Uachtaránacht na Portaingéile le fáil in Iarscríbhinn 1 a ghabhann leis an Tuarascáil seo. Na hathruithe a rinneadh ar an togra ón gCoimisiún (12477/20), tá **cló trom** orthu, marcáiltear an méid a scriosadh le [...]. Leis an togra comhréitigh seo cumhdaítear na codanna sin den togra ón gCoimisiún a raibh scrúdú déanta orthu ag comhaltaí SQWP faoin am sin.

An 21 Eanáir 2021, tháinig deireadh leis an tréimhse 8 seachtaine chun dul i gcomhairle leis na parlaimintí náisiúnta de réir Airteagal 6 de Phrótacal Uimh. 2¹ atá i gceangal leis na Conarthaí. Faoin dáta sin, ní raibh tuairimí réasúnaithe seolta isteach ach ag parlaimintí náisiúnta trí cinn de Bhallstáit (DK, MT, SE), nár leor, de réir mhír 2 d'Airteagal 7 den phrótacal sin, chun an oibleagáid a ghníomhachtú i ndáil le hathbhreithniú a dhéanamh ar neamhchomhlíonadh phrionsabal na coimhdeachta.

Níor thug Parlaimint na hEorpa a seasamh ar an gcéad léamh uaithi go fóill. Maidir leis an mbunús dlí atá beartaithe d'Airteagal 153(2), i gcomhar le pointe (b) d'Airteagal 153(1) den Chonradh ar Fheidhmiú an Aontais Eorpaigh (CFAE), tá sé de cheangal ar an gComhairle gníomhú i gcomhréir leis an ngnáthnós imeachta reachtach le Parlaimint na hEorpa.

Tá tuairimí maidir leis an togra tugtha ag Coiste Eacnamaíoch agus Sóisialta na hEorpa agus ag Coiste na Réigiún².

Ag an gcéim seo, meastar go bhfuil forchoimeádas grinnscrúdaithe ginearálta ag na toscaireachtaí uile maidir leis an togra.

¹ Prótacal (Uimh. 2) maidir le prionsabail na coimhdeachta agus na comhréireachta a chur i bhfeidhm, IO C 326, 26.10.2010, lch. 206-209.

² 7886/21(EESC) agus 7421/21 (CoR)

II. OBAIR NA COMHAIRLE FAOI UACHTARÁNACHT NA PORTAINGÉILE

Agus iad ag fanacht leis an tuairim ó Sheirbhís Dlí na Comhairle maidir leis an mbunús dlí, ar mheas a lán toscaireachtaí gur réamhchoinníoll polaitiúil é chun bogadh ar aghaidh, rinne comhaltaí SQWP meastóireacht ar mheasúnú tionchair an Choimisiúin (12477/21 ADD3). Cuireadh ceistneoir chuig na toscaireachtaí an 2 Samhain 2020 ar thug 26 Bhallstát freagra air. Rinneadh anailís agus plé críochnaitheach ar an Measúnú Tionchair ag físchomhdháil neamhfhoirmiúil de chomhaltaí SQWP an 20 Eanáir 2021. Tá achoimre na huachtaránachta ar an meastóireacht sin le fáil in Iarscríbhinn 2 a ghabhann leis an Tuarascáil seo.

Agus an tuairim ó Sheirbhís Dlí na Comhairle agus na tuairimí a chuir na toscaireachtaí in iúl á gcur san áireamh, thíolaic an Uachtaránacht téacs comhréitigh ag deireadh mhí Aibreáin 2021. Níor cumhdaíodh na haithrisí sa téacs sin toisc nach raibh plé déanta orthu fós ag comhaltaí SQWP, ná níor cumhdaíodh Airteagal 10 toisc go raibh an plé ina leith curtha ar athló go dtí go ndéanadh an Coimisiún faisnéis bhreise theicniúil i scríbhinn a thíolacadh (5391/21).

III. NA PRÍOMH-SHAINCHEISTEANNA A PLÉADH AR LEIBHÉAL NA MEITHLE

Ábhar

Tar éis plé críochnúil a dhéanamh ar na hoibleagáidí arna gcruthú le hAirteagal 1, chuir an Uachtaránacht isteach – i gcomhréir leis na tuairimí a chuir a lán toscaireachtaí in iúl – an nath ‘**cur chun cinn**’ i mír 1 chun aidhm fhoriomlán na Treorach a shoiléiriú, é ag teacht in ionad an fhocail ‘socrú’ freisin roimh *leibhéil leordhóthanacha íosphá* i mír 1 lit.(a).

Trí athfhoirmliú beag a dhéanamh, shoiléirigh an Uachtaránacht go bhfuil dhá shoiléiriú i mír 3 d’Airteagal 1: 1) maidir le Ballstáit a bhíonn ag brath go heisiach ar chomhaontuithe comhchoiteanna chun pá a shocrú, nach bhfuil sé d’oibleagáid orthu íosphá reachtúil a thabhairt isteach agus 2) nach bhfuil oibleagáid ar aon Bhallstát comhaontuithe comhchoiteanna a chur i bhfeidhm go huilíoch.

Cearta duine aonair

D'iarr roinnt Ballstát go dtabharfaí ráthaíochtaí nach gcruthófaí cearta duine aonair d'oibrithe leis an treoir seo. Agus na moltaí a bhí i dtuairim Sheirbhís Dlí na Comhairle i ndáil le soiléirithe níos fearr á gcur san áireamh, thug an Uachtaránacht freagra air sin, i gcomhréir le hAirteagal 1 den togra, trí theideal na treorach a athrú go 'Treoir maidir le **creat le haghaidh** pá íosta leordhóthanach san Aontas Eorpach'. Ar an gcúis chéanna sin, scriosadh an focal 'eile' as an gclásal caighdeánach neamh-chúlchéimnithe i mír 3 d'Airteagal 16. Bhí roinnt Ballstát sásta leis na hathruithe sin. Mar sin féin, iarradh go ndéanfaí soiléiriú breise a chur ar fáil, e.g. in Airteagail 1 agus 11.

Teorainn leis an raon feidhme

Arna iarraidh sin do phéire Ballstát, chuir an Uachtaránacht mír 2 nua isteach in Airteagal 2, lena gceadaítear do na Ballstáit maraithé, a chumhdaítear leis an gCoinbhinsiún Oibreachais Mhuirí 2006 arna leasú, a eisiamh ó chur i bhfeidhm na treorach seo. Cé go rabhthas sásta leis sin, iarradh freisin nach gcuirfí i bhfeidhm é i ndáil le hiascairí mara i gcásanna áirithe. D'ardaigh roinnt Ballstát an fhadhb shonrach a bhaineann le státseirbhísigh, a bhfuil caidreamh oibre faoin dlí poiblí acu i roinnt mhaith Ballstát.

Cosaint pá íosta trí chómhargáil seachas cosaintí le pá íosta reachtúil

D'ardaigh roinnt Ballstát ceist an measfaí pá íosta arna chaibidliú ag na comhpháirtithe sóisialta agus a dhéanfaí infheidhme go ginearálta, ina dhiaidh sin, trí ghníomh riaracháin, a bheith ina phá íosta reachtúil nó ina phá íosta arna shocrú le cómhargáil. Mar fhreagra air sin, rinne an Uachtaránacht na sainmhínithe in Airteagal 3 ar 'pá íosta reachtúil', 'comhaontú comhchoiteann' agus 'cumhdach cómhargála' a choigeartú. Bhí formhór na dtoscaireachtaí sásta leis an méid sin.

Oibleagáid chun cumhdach cómhargála a chur chun cinn

Chun freagra a thabhairt ar na hiarrataí óna lán toscaireachtaí, a tharraing aird ar shainiúlachtaí a gcóras náisiúnta cómhargála agus go háirithe a thábhachtaí a bhí comhaontuithe comhchoiteanna ar leibhéal na gcuideachtaí i roinnt Ballstát, chuir an Uachtaránacht isteach na focail **‘i gcomhréir le dlíthe agus cleachtais náisiúnta’** i mír 1 d’Airteagal 4 chomh maith leis na focail **‘go háirithe’** i bhfophointe (a).

Mar fhreagra ar an iarratas ó roinnt mhaith Ballstát go dtabharfaí níos mó cinnteachta maidir lena n-oibleagáidí i gcás nach dtiocfaidís ar chumhdach cómhargála de 70 % agus chun na hoibleagáidí a chuíchóiriú, soiléiríodh i mír 2 d’Airteagal 4 nach mbeadh orthu ach plean gníomhaíochta a bhunú lena n-áirítear creat coinníollacha cumasúcháin, nach mbeadh gá lena athbhreithniú ach ag eatramh rialta de [x] bliana, a bheadh le socrú sa treoir.

Leordhóthanacht an phá íosta reachtúil

Shoiléirigh an Uachtaránacht go bhfuiltear ag féachaint, leis an treoir, le leordhóthanacht pá íosta reachtúil a chur chun cinn, trí theideal Airteagal 5 a mhodhnú. Tríd an bhfocal ‘creat’ a thabhairt isteach i mír 1 d’Airteagal 5, chuir an Uachtaránacht chun suntais arís gur treoir réime í an treoir seo.

Mar fhreagra ar an áitiú óna lán Ballstát go mbeadh níos mó solúbthachta ann, chuir an Uachtaránacht soiléiriú isteach i mír 2 d’Airteagal 5 go bhféadfaidh **‘na Ballstáit cinneadh a dhéanamh maidir le hábharthacht agus meáchan coibhneasta’** na gcritéar sa mhír sin **‘i gcomhréir leis na dálaí náisiúnta socheacnamaíocha atá i réim iontu.’** Cé go rabhthas sásta leis an athrú sin, d’iarr a lán toscaireachtaí ar an Uachtaránacht dul níos faide agus gan úsáid na gceithre chritéar a choinneáil mar bheart éigeantach.

D’iarr roinnt Ballstát go ndéanfaí mír 3 d’Airteagal 5 a scriosadh.

Éagsúlachtaí agus asbhaintí

Rinneadh Airteagal 6 maidir le héagsúlachtaí agus asbhaintí a athfhoirmliú mar fhreagra ar an gcáineadh go mbeadh an foirmliú sa togra ón gCoimisiún ‘Féadfaidh na Ballstáit a cheadú’... bunaithe ar an tuiscint go bhfuil an inniúlacht ag an Aontas, ar an gcéad dul síos, na rátaí nó an luach saothair sin a shocrú agus ansin go bhféadfadh sé na Ballstáit a údarú maolú a thabhairt isteach ina leith, rud a bheadh contrártha le hAirteagal 153(5) CFAE. Cé go raibh roinnt toscaireachtaí sásta leis an téacs ón Uachtaránacht, d’iarr toscaireachtaí eile go neartófaí an téacs ón gCoimisiún tuilleadh fós agus d’iarr roinnt toscaireachtaí eile go ndéanfaí an t-airteagal iomlán a scriosadh.

Soláthar poiblí

Maidir le hAirteagal 9, arb é an soláthar poiblí ab ábhar dó agus nach raibh beartaithe ag an gCoimisiún ach go mbeadh athrá ann ar na hoibleagáidí atá ann cheana i dTeoracha 2014/24/AE, 2014/25/AE agus 2014/23/AE, cháin roinnt Ballstát é mar iomarcach agus d’iarr siad, dá réir sin, go ndéanfaí é a scriosadh. Ba é rogha na hUachtaránachta, áfach, (agus tacaíocht aici ó roinnt toscaireachtaí), an t-airteagal a mhodhnú d’fhonn a bhfuil ann a shoiléiriú, go háirithe go mbaineann an oibleagáid sin freisin le fochonraitheoirí agus leis na hoibleagáidí i ndáil le pá atá i ndlí an Aontais, sa dlí náisiúnta, i gcomhaontuithe comhchoiteanna agus i bhforálacha dlí idirnáisiúnta an tsaothair.

Oibleagáidí ginearálta na mBallstát

Tar éis an chéad phlé a rinneadh ar leibhéal na meithle, mheas tromlach leathan na mBallstát go mbeadh gá le faisnéis bhreise ón gCoimisiún i scríbhinn agus go háirithe faisnéis faoi na sonraí a bheadh le tuairisciú faoi mhír 2 d’Airteagal 10, eadhon, cé mhéad di a bheadh bailithe cheana féin, agus á cur ar fáil, dá bhrí sin, mar shampla ag Eurostat nó Eurofound. An 22 Aibreán 2021, thíolaic an Coimisiún páipéar leathoifigiúil ina raibh faisnéis níos mionsonraithe (5391/21) agus a rinne comhaltaí SQWP é a phlé an 4 Bealtaine 2021. Le linn an chruinnithe sin, mheas a lán toscaireachtaí fós go gcruthódh na hoibleagáidí tuairiscithe sin, agus go háirithe an raon leathan agus an dí-chomhiomlánú sonraí, ualach riaracháin díréireach do na Ballstáit, do Chomhpháirtithe Sóisialta agus d’fhiontair.

IV. CONCLÚIDÍ

Fad is a bhí an obair ag dul ar aghaidh ar an leibhéal teicniúil, ar an leibhéal polaitiúil d'fhéach Uachtaránacht na Portaingéile an bhféadfaí tromlach cáilithe a bhaint amach don togra. Chinn siad nach bhfuil an comhad sách aibí fós chun an tromlach sin a bhaint amach. Dá bhrí sin, is faoin gcéad uachtaránacht eile a bheidh sé leanúint den phlé sa Chomhairle agus ina comhlachtaí ullmhúcháin d'fhonn teacht ar chomhaontú maidir le Cur Chuige Ginearálta.

Measann Uachtaránacht na Portaingéile go bhfuil bunús láidir ann anois chun an obair theicniúil agus pholaitiúil ar an gcomhad seo a thabhairt chun críche.

Togra le haghaidh

TREOIR Ó PHARLAIMINT NA hEORPA AGUS ÓN gCOMHAIRLE

maidir le **creat le haghaidh** pá íosta leordhóthanach san Aontas Eorpach

TÁ PARLAIMINT NA hEORPA AGUS COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe Airteagal 153(2), i gcomhar le pointe (b) d'Airteagal 153 (1), de

Ag féachaint don togra ón gCoimisiún Eorpach,

Tar éis dóibh an dréachtghníomh reachtach a chur chuig na parlaimintí náisiúnta,

Ag féachaint don tuairim ó Choiste Eacnamaíoch agus Sóisialta na hEorpa³,

Ag féachaint don tuairim ó Choiste na Réigiún⁴,

Ag gníomhú dóibh i gcomhréir leis an ngnáthnós imeachta reachtach,

De bharr an mhéid seo a leanas:

- (1) De bhun Airteagal 3 den Chonradh ar an Aontas Eorpach, is iad cuspóirí an Aontais, *inter alia*, dea-bhail a chuid pobal a chur chun cinn agus oibriú ar mhaithe le forbairt inbhuanaithe na hEorpa arna fothú ar gheilleagar sóisialta margaidh ina bhfuil iomaíocht ghéar.

³ IO C , , lch. .

⁴ IO C , , lch. .

- (2) Déantar foráil in Airteagal 31 den Chairt um Chearta Bunúsacha an Aontais Eorpaigh⁵ don cheart atá ag gach oibrí chun dálaí oibre lena n-urramaítear a shláinte nó a sláinte, a shábháilteacht nó a sábháilteacht agus a dhínit nó a dínit.
- (3) Leagtar síos i gCairt Shóisialta na hEorpa go bhfuil an ceart ag gach oibrí chun dálaí córa oibre. Aithnítear inti an ceart atá ag gach oibrí chun luach saothair cóir atá leordhóthanach le haghaidh caighdeán sásúil maireachtála dó féin agus dá theaghlach. Aithnítear in Airteagal 4 den Chairt ról na gcomhaontuithe comhchoiteanna a chuirtear i gcrích gan bhac gan bheann agus sásraí socraithe pá íosta, chun feidhmiú éifeachtach an chirt sin a áirithiú.
- (4) I gCaibidil II de Cholún Eorpach na gCeart Sóisialta, a fógraíodh an 17 Samhain 2017 in Gothenburg, leagtar síos tacar prionsabal mar threoir chun coinníollacha córa oibre a áirithiú. Athdhaingnítear le Prionsabal Uimh. 6 de Cholún Eorpach na gCeart Sóisialta an ceart atá ag oibrithe pá cothrom a fháil a fhágann gur féidir leo caighdeán maith maireachtála a bheith acu.. Foráiltear leis freisin go ndéanfar pá íosta leordhóthanach a áirithiú, ar bhealach a fhágann go ndéanfar riachtanais an oibrí agus a theaghlaigh a shásamh i bhfianaise dálaí náisiúnta eacnamaíocha agus sóisialta, agus cosnófar rochtain ar fhostaíocht agus dreasachtaí chun obair a lorg san am céanna. Ina theannta sin, meabhraítear ann go gcuirfear cosc ar an mbochtaineacht ina measc siúd atá ag obair. agus go socrófar gach tuarastal ar bhealach trédhearcach intuatha, agus neamhspleáchas na gcomhpháirtithe sóisialta á urramú.

⁵ An Chairt um Chearta Bunúsacha an Aontais Eorpaigh 2012/C 326/02 IO C326/391 an 26.10.2012.

- (5) I dTreoirlíne 5 de Chinneadh 2020/1512/AE ón gComhairle maidir le treoirlínte le haghaidh bheartais fostaíochta na mBallstát⁶ iarrtar ar na Ballstáit rannpháirtíocht éifeachtach na gcomhpháirtithe sóisialta i socrú pá a áirithiú, lena bhforáiltear do phá cóir a éascaíonn caighdeán sásúil maireachtála agus lena gcuirtear freagrúlacht leordhóthanach an phá i leith forbairtí táirgiúlachta san áireamh, ar mhaithe leis an gcóineasú aníos. Sa Treoirlíne iarrtar freisin ar na Ballstáit an t-idirphlé sóisialta agus an chómhargáil i socrú pá a chur chun cinn. Iarrtar freisin ar na Ballstáit agus ar na comhpháirtithe sóisialta a áirithiú go bhfuil pá leordhóthanach cóir ag gach oibrí a bhuí le comhaontuithe comhchoiteanna nó le pá íosta reachtúil leordhóthanach, agus an tionchar atá ag an méid sin ar an iomaíochas, ar chruthú post agus ar bhochtaineacht lucht oibre a chur san áireamh. Luaitear sa Straitéis Bhliantúil maidir le Fás Inbhuanaithe 2021⁷ gur cheart do na Ballstáit bearta a ghlacadh chun dálaí córa oibre a áirithiú. Chomh maith leis sin, meabhraítear sa Straitéis Bhliantúil um Fhás Inbhuanaithe 2020⁸, i gcomhthéacs an mhéadaithe atá ag teacht ar bhearnaí sóisialta, go bhfuil sé tábhachtach a áirithiú go mbeidh pá leordhóthanach á shaothrú ag gach oibrí. Eisíodh roinnt Moltaí Tírshonracha chomh maith chuig roinnt Ballstát i réimse an phá íosta. Mar sin féin, d'fhéadfadh sé gur beag fonn a bheadh ar thíortha aonair feabhas a chur ar a gcuid socruithe pá íosta de dheasca na tuairime go bhféadfadh sin tionchar diúltach a imirt ar an iomaíochas maidir le costas seachtrach.
- (6) Tairbhíonn idir oibrithe agus ghnólachtaí san Aontas d'fheabhas a chur ar dhálaí oibre agus maireachtála, lena n-áirítear trí phá íosta leordhóthanach, agus is réamhriachtanas é chun fás cuimsitheach inbhuanaithe a bhaint amach. Trí aghaidh a thabhairt ar dhifríochtaí móra maidir le cuimsiú agus le leordhóthanacht an phá íosta, cuirtear feabhas ar chothroime mhargadh saothair an Aontais Eorpaigh agus cothaítear dul chun cinn eacnamaíoch agus sóisialta agus an cóineasú aníos. Ba cheart iomaíocht sa Mhargadh Aonair a bheith bunaithe ar ardchaighdeán shóisialta, ar an nuálaíocht agus ar fheabhsuithe táirgiúlachta lena n-áiríteofar cothrom na Féinne.

⁶ Cinneadh 2020/1512/AE ón gComhairle an 13 Deireadh Fómhair 2020 maidir le treoirlínte le haghaidh bheartais fostaíochta na mBallstát (IO L 344, 19.10.2020, lgh. 22-28).

⁷ Teachtaireacht COM (2020) 575 final ón gCoimisiún.

⁸ Teachtaireacht COM (2019) 650 final ón gCoimisiún.

- (7) Nuair a shocraítear an pá íosta ar leibhéil leordhóthanacha cosnaítear ioncam oibrithe faoi mhíbhuntáiste agus cuidítear le slí bheatha shásúil a áirithiú agus teorannaítear laghduithe ioncaim le linn cúluithe eacnamaíochta, mar a aithnítear i gCoinbhinsiún 131 den Eagraíocht Idirnáisiúnta Saothair maidir le córais socraithe pá íosta a bhunú. Le pá íosta cuidítear le héileamh intíre a chothabháil, neartaítear na dreasachtaí atá ann chun obair a dhéanamh, laghdaítear neamhionannas pá agus bochtaineacht lucht saothair.
- (8) Is mó an dóchúlacht go mbeidh mná, oibrithe óga, oibrithe ar bheagán oiliúna agus daoine atá faoi mhíchumas ar phá íosta ná grúpaí eile. Le linn cor chun donais eacnamaíocha, amhail géarchéim COVID-19, éiríonn ról an phá íosta níos tábhachtaí i gcosaint oibrithe ar phá íseal agus bíonn sé riachtanach chun tacú le téarnamh eacnamaíoch inbhuanaithe cuimsitheach. Trí aghaidh a thabhairt ar an bpá íosta cuidítear leis an gcomhionannas inscne, le deireadh a chur leis an mbearna pá agus phinsin idir na hinscní agus tugtar mná slán as an mbochtaineacht.
- (9) Tá tionchar suntasach á imirt ag paindéim COVID-19 ar an earnáil seirbhísí agus ar ghnólachtaí beaga, ina bhfuil sciar ard de na hoibrithe ar phá íosta. Chomh maith leis sin, tá an pá íosta tábhachtach i bhfianaise na dtreochtaí struchtúracha atá ag déanamh athmhúnlú ar mhargaí saothair agus ina bhfuil méadú ag teacht ar sciartha arda d’obair neamhchaighdeánach agus obair fhorbhásach. Tá méadú tagtha ar pholarú oibre mar thoradh ar na treochtaí sin agus sciar méadaitheach gairmeacha ar bheagán oiliúna agus ar bheagán pá i bhformhór na mBallstát dá bharr, agus neamhionannas pá níos airde i roinnt acu chomh maith.
- (10) Cé gur ann do chosaint pá íosta i ngach Ballstát, i roinnt Ballstát eascraíonn an chosaint sin as forálacha reachtacha (‘pá íosta reachtúil’) agus as comhaontuithe comhchoiteanna agus i mBallstáit eile cuirtear ar fáil é go heisiach trí chomhaontuithe comhchoiteanna.
- (11) Tá an chosaint pá íosta a leagtar amach i gcomhaontuithe comhchoiteanna maidir le slite beatha ar phá íseal leordhóthanach den chuid is mó; tá an pá íosta reachtúil íseal i gcomparáid leis an bpá eile sa gheilleagar i roinnt Ballstát. In 2018, níor leor mar ioncam an pá íosta reachtúil le go mbainfeadh saothraí singil ar phá íosta an tairseach baoil bochtaineachta amach i naoi mBallstát. Chomh maith leis sin, bíonn tionchar diúltach ar leordhóthanacht an phá íosta ag rátaí pá íosta laghdaithe (athruithe) agus asbhaintí as an bpá íosta reachtúil.

- (12) Ní chosnaítear gach oibrí san Aontas le pá íosta. I roinnt Ballstát faigheann roinnt oibrithe, cé go gcumhdaítear iad, luach saothair atá níos ísle ná an pá íosta reachtúil de bharr neamh-urraim do na rialacha atá ann cheana. Go háirithe, fuarthas amach go bhfuil tionchar ag an neamhchomhlíonadh sin ar mhná, ar dhaoine óga, ar dhaoine atá faoi mhíchumas agus ar oibrithe talmhaíochta. Sna Ballstáit ina gcuirtear cosaint ar phá íosta ar fáil trí chomhaontuithe comhchoiteanna amháin, meastar gur idir 2 % agus 55 % de na hoibrithe uile é sciar na n-oibrithe nach gcumhdaítear.
- (13) Cé go gcuidíonn an chómhargáil láidir ar leibhéal na hearnála nó ar an leibhéal trasteionscail le cosaint pá íosta leordhóthanach a áirithiú, tá laghdú ag teacht ar struchtúir thraidisiúnta chómhargála le 20 nó 30 bliain anuas de bharr, i measc rudaí eile, athruithe struchtúracha sa gheilleagar i dtreo earnálacha inar lú an t-eagar ceardchumann agus de bharr laghdú ar bhallraíocht i gceardchumann atá bainteach le méadú ar chineálacha oibre neamhghnácha agus cineálacha oibre nua.
- (14) Chuaigh an Coimisiún i gcomhairle leis an mbainistíocht agus leis an lucht saothair i bpróiseas dhá chéim maidir le gníomhaíocht a d'fhéadfaí a dhéanamh chun aghaidh a thabhairt ar na dúshláin a bhaineann le cosaint pá íosta leordhóthanach san Aontas, i gcomhréir le hAirteagal 154 den Chonradh ar Fheidhmiú an Aontais Eorpaigh. Ní raibh aon chomhaontú ann i measc na gcomhpháirtithe sóisialta i dtaobh dul i mbun caibidlíochta maidir leis na hábhair sin. Tá sé tábhachtach, áfach, gníomhaíocht a dhéanamh ar leibhéal an Aontais chun a áirithiú go gcosnófar oibrithe san Aontas le pá íosta leordhóthanach, agus torthaí chomhairliúcháin na gcomhpháirtithe sóisialta á gcur san áireamh.
- (15) Bunaítear leis an Treoir seo ceanglais íosta ar leibhéal an Aontais chun a áirithiú go socrófar an pá íosta ar leibhéal leordhóthanach agus go mbeidh rochtain ag oibrithe ar chosaint pá íosta, i bhfoirm pá íosta reachtúil nó i bhfoirm pá a shocraítear faoi chomhaontuithe comhchoiteanna mar a shainmhínítear chun críoch na Treorach seo.

- (16) Agus Airteagal 153(5) den Chonradh ar Fheidhmiú an Aontais Eorpaigh á urramú go hiomlán, níl sé d'aidhm ag an Treoir seo leibhéal an phá íosta ar fud an Aontais a chomhchuibhiú ná sásra aonfhoirmeach maidir le socrú pá íosta a bhunú. Ní chuireann sé sin isteach ar shaoirse na mBallstát pá íosta reachtúil a shocrú nó rochtain ar chosaint pá íosta a sholáthraítear le comhaontuithe comhchoiteanna a chur chun cinn, rud a dhéanfaí de réir thraidisiúin agus shainiúlachtaí gach tíre agus lena dtabharfaí lánurraim d'inniúlachtaí náisiúnta agus do shaoirse chonarthaigh na gcomhpháirtithe sóisialta. Ní fhorchuirtear oibleagáid leis an Treoir seo ar na Ballstáit ina n-áirítear socrú pá go heisiach via comhaontuithe comhchoiteanna pá íosta reachtúil a thabhairt isteach nó comhaontuithe comhchoiteanna a bheith infheidhme go huilíoch. Chomh maith leis sin, ní bhunaítear leis an Treoir seo leibhéal an phá, a thagann faoi shaoirse chonarthaigh na gcomhpháirtithe sóisialta ar an leibhéal náisiúnta agus faoi inniúlacht ábhartha na mBallstát.
- (17) Ba cheart feidhm a bheith ag an Treoir seo maidir le hoibrithe ag a bhfuil conradh fostaíochta nó caidreamh fostaíochta mar a shainmhínítear sa dlí, le comhaontuithe comhchoiteanna nó leis an gcleachtas atá i bhfeidhm i ngach Ballstát, agus na critéir arna mbunú ag Cúirt Bhreithiúnais an Aontais Eorpaigh maidir le stádas oibrí a chinneadh á gcur san áireamh. Maidir le hoibrithe tí, oibrithe ar éileamh, oibrithe eadrannacha, oibrithe dearbhánbhunaithe, féinfhostaithe bréige, oibrithe ardáin, oiliúnaithe agus printísigh, d'fheadfaidís, ar choinníoll go gcomhlíonfaidís siad na critéir sin, teacht faoi raon feidhme na Teorach seo. **I bhfianaise na sainiúlachtaí a bhaineann le dálaí fostaíochta do mharaithe, go háirithe maidir le pá íosta a chinneadh i gcomhréir leis na nósanna imeachta a leagtar síos sa Choinbhinsiún Oibreachais Mhuirí, 2006, arna leasú, ba cheart do na Ballstáit a bheith in ann cinneadh a dhéanamh catagóir na n-oibrithe sin a eisiáil ón Treoir seo.**

(17a-nua) Daoine ar fíor go bhfuil siad féinfhostaithe, ní thagann siad faoi chuimsiú raon feidhme na Treorach seo ós rud é nach gcomhlíonann siad na critéir sin. Is cineál oibre a dhearbhaítear go bréagach í drochúsáid stádais daoine féinfhostaithe, mar a shainmhínítear sa dlí náisiúnta í, ar an leibhéal náisiúnta nó i gcásanna trasteorann, agus is minic a bhíonn baint ag obair neamhdhearbhaithe léi. Tarlaíonn féinfhostaíocht bhréige nuair a dhearbhaítear go bhfuil duine féinfhostaithe, fad a chomhlíonann sé na coinníollacha is saintréithe de chaidreamh fostaíochta, chun oibleagáidí dlíthiúla nó fioscacha áirithe a sheachaint. Ba cheart go dtiocfadh na daoine sin faoi chuimsiú raon feidhme na Treorach seo. Ba cheart gur leis na fíorais a bhaineann leis an obair iarbhir a dhéantar a threorófaí an cinneadh an ann do chaidreamh fostaíochta agus ní bunaithe ar an tuairisc a dhéanann na páirtithe ar an gcaidreamh.

(18) Is modh tábhachtach é cómhargáil dhea-fheidhmiúil i socrú pá chun a áirithiú go gcosnaítear oibrithe le pá íosta leordhóthanach. Sna Ballstát ina bhfuil pá íosta reachtúil, tacaíonn an chómhargáil le forbairtí ginearálta pá agus mar sin cuidíonn sí le leordhóthanacht an phá íosta a fheabhsú. Sna Ballstáit ina soláthraítear cosaint maidir le pá íosta tríd an gcómhargáil amháin, is le feidhmiú an chórais cómhargála agus an chumhdaigh cómhargála go díreach a chinntear a leibhéal agus sciar na n-oibrithe a chosnaítear. Is le cómhargáil láidir dhea-fheidhmiúil agus cumhdach ard ar chomhaontuithe comhchoiteanna earnála nó trastionscail a neartaítear leordhóthanacht agus cumhdach an phá íosta.

- (19) I gcomhthéacs cumhdaigh cómhargála atá ag laghdú, tá sé ríthábhachtach go gcuireann na Ballstáit an chómhargáil chun cinn chun feabhas a chur ar rochtain oibrithe ar chosaint pá iosta a sholáthraítear le comhaontuithe comhchoiteanna. Is gnách gur sciar íseal oibrithe ar phá íseal agus pá iosta ard a bhíonn ag na Ballstáit a bhfuil cumhdach cómhargála ard acu. Is gnách gur ráta cómhargála os cionn 70 % a bhíonn ag na Ballstáit ina bhfuil sciar íseal oibrithe ar phá íseal. Ar an gcaoi chéanna, tá cumhdach cómhargála os cionn 70 % ag formhór na mBallstát a bhfuil leibhéil arda pá iosta acu i gcoibhneas leis an bpá airmheánach. Cé gur cheart na Ballstáit uile a spreagadh chun an chómhargáil a chur chun cinn, na Ballstáit nach n-éiríonn leo an leibhéal cumhdaigh sin a bhaint amach, ba cheart dóibh, i gcomhairle agus/nó i gcomhaontú leis na comhpháirtithe sóisialta, creat nósanna imeachta éascaitheacha agus socruithe institiúideacha lena n-éascaítear na coinníollacha maidir leis an gcómhargáil a sholáthar nó, sa chás ina bhfuil a leithéid sin ann cheana, é a neartú. Ba cheart an creat sin a bhunú le dlí nó le comhaontú trípháirteach.
- (20) Is gá rialacha, nósanna imeachta agus cleachtas fóna maidir le pá iosta reachtúil a shocrú agus a nuashonrú, **lena n-áirítear trí innéacsú uathoibríoch** chun pá iosta leordhóthanach a sholáthar, agus poist agus iomaíochas gnóthas a chosaint, lena n-áirítear fiontair bheaga agus mheánmhéide. Áirítear orthu roinnt gnéithe chun leordhóthanacht an phá iosta reachtúil a chaomhnú, lena n-áirítear critéir agus táscairí chun measúnú a dhéanamh ar leordhóthanacht, ar nuashonruithe rialta tráthúla, ar chomhlachtaí comhairleacha a bheith ann agus ar pháirtíocht na gcomhpháirtithe sóisialta. Is gné eile den dea-rialachas í rannpháirtíocht thráthúil éifeachtach na gcomhpháirtithe sóisialta lena bhféadfar próiseas cinnteoireachta eolach cuimsitheach a chur ar fáil.

- (21) Meastar go bhfuil an pá íosta leordhóthanach más rud é go bhfuil sé cóir i ndáil le dáileadh pá sa tír agus má sholáthraíonn sé caighdeán sásúil maireachtála. Cinntear leordhóthanacht an phá íosta reachtúil i bhfianaise na ndálaí socheacnamaíocha náisiúnta, lena n-áirítear fás fostaíochta, iomaíochas agus forbairtí réigiúnacha agus earnála chomh maith. Ba cheart a leordhóthanacht a mheas ar a laghad i ndáil lena gcumhacht ceannaigh, leis na forbairtí táirgiúlachta agus leis an ngaolmhaireacht atá acu le leibhéal an ollphá, le dáileadh agus le fás. Is féidir leis na táscairí a úsáidtear go minic ar an leibhéal idirnáisiúnta, amhail 60 % den ollphá airmheánach agus 50 % den mheán-ollphá, a bheith ina gcuidiú chun leordhóthanacht pá íosta a mheasúnú i ndáil le leibhéal an ollphá.
- (22) Chun leordhóthanacht pá íosta a chur chun cinn le haghaidh gach grúpa oibrithe, ba cheart athruithe ar an bpá íosta reachtúil agus asbhaintí as a bheith teoranta don mhéid íosta, agus a áirithiú ag an am céanna go rachfar i gcomhairle go hiomchuí leis na comhpháirtithe sóisialta maidir lena sainmhíniú. D'fhéadfadh sé go mbeadh údar maith le roinnt asbhaintí as an bpá íosta reachtúil mar gheall ar aidhm dhlisteanach, lena n-áirítear méideanna a íocadh nó asbhaintí a d'ordaigh údarás breithiúnach. D'fhéadfadh asbhaintí eile amhail asbhaintí a bhaineann leis an trealamh is gá chun post a dhéanamh nó asbhaintí as liúntais chomhchineáil, amhail lóistín, a bheith gan údar nó díreireach.
- (23) Is gá córas forfheidhmithe éifeachtach, lena n-áirítear rialuithe agus cigireachtaí allamuigh, chun feidhmiú creataí náisiúnta pá íosta reachtúil a áirithiú. Chun éifeachtúlacht na n-údarás forfheidhmithe a neartú, is gá dlúthchomhar leis na comhpháirtithe sóisialta chomh maith, lena n-áirítear chun aghaidh a thabhairt ar dhúshláin rithábachtacha amhail iad sin a bhaineann le fochonraitheoireacht, féinfhostaíocht bhréige nó ragobair gan taifead. Ina theannta sin, ba cheart rochtain éasca a bheith ag oibrithe ar fhaisnéis iomchuí maidir leis an bpá íosta reachtúil is infheidhme chun leibhéal leordhóthanach trédhearcachta agus intuarthachta i dtaca lena ndálaí oibre a áirithiú.

- (24) Ní mór go leagfar amach an cur chun feidhme éifeachtach ar chosaint pá íosta le forálacha dlíthiúla nó go soláthrófar é le comhaontuithe comhchoiteanna agus soláthar poiblí agus conarthaí lamháltais á gcomhlíonadh. Neamh-urramú na gcomhaontuithe comhchoiteanna trína bhforáiltear cosaint pá íosta in earnáil ar leith, d'fhéadfadh sin tarlú agus na conarthaí sin á gcur i gcrích nó sa slabhra fochonraitheoireachta ina dhiaidh sin, rud a d'fhágfadh go n-íocfaí níos lú ná an leibhéal pá a aontaítear sna comhaontuithe comhchoiteanna earnála le hoibrithe. Chun cásanna den chineál sin a chosc, ní mór d'oibreoirí eacnamaíocha an pá a socraíodh le comhaontuithe comhchoiteanna don earnáil ábhartha agus don limistéar geografach a chur i bhfeidhm maidir lena n-oibrithe chun cloí leis na hoibleagáidí is infheidhme i réimse dhlí an tsaothair, i gcomhréir le hAirteagail 18(2) agus 71(1) de Threoir 2014/24/AE ó Pharlaimint na hEorpa agus ón gComhairle maidir le soláthar poiblí⁹, Airteagail 36(2) agus 88(1) de Threoir 2014/25/AE ó Pharlaimint na hEorpa agus ón gComhairle¹⁰ maidir le soláthar arna dhéanamh ag eintitis a fheidhmíonn in earnáil an uisce, an fhuinnimh, an iompair agus na seirbhísí poist agus Airteagail 30(3) agus 42(1) de Threoir 2014/23/AE ó Pharlaimint na hEorpa agus ón gComhairle¹¹ maidir le conarthaí lamháltais a dhámhachtain.
- (25) Tá faireachán iontaofa agus bailiú sonraí ríthábhachtach chun cosaint pá íosta éifeachtach a áirithiú. Ba cheart don Choimisiún a mheasúnú ar fhorbairtí maidir le leordhóthanacht agus cumhdach an phá íosta ar bhonn sonraí bliantúla agus faisnéise atá le soláthar ag na Ballstáit a chur faoi bhráid Pharlaimint na hEorpa agus na Comhairle gach bliain. Chomh maith leis sin, ba cheart faireachán a dhéanamh ar dhul chun cinn phróiseas comhordaithe an bheartais eacnamaíoch agus fostaíochta ar leibhéal an Aontais. Sa chomhthéacs sin, ba cheart don Choiste Fostaíochta scrúdú a dhéanamh gach bliain ar an staid reatha sna Ballstáit ar bhonn na dtuarascálacha a dhéanfaidh an Coimisiún agus ar bhonn uirlisí faireachais iltaobhacha eile amhail tagarmharcáil.

⁹ Treoir 2014/24/AE ó Pharlaimint na hEorpa agus ón gComhairle an 26 Feabhra 2014 maidir le soláthar poiblí agus lena n-aisghairtear Treoir 2004/18/CE (IO L 94, 28.3.2014, lch. 65).

¹⁰ Treoir 2014/25/AE ó Pharlaimint na hEorpa agus ón gComhairle an 26 Feabhra 2014 maidir le soláthar arna dhéanamh ag eintitis a fheidhmíonn in earnáil an uisce, an fhuinnimh, an iompair agus na seirbhísí poist agus lena n-aisghairtear Treoir 2004/17/CE (IO L 94, 28.3.2014, lch. 243).

¹¹ Treoir 2014/23/AE ó Pharlaimint na hEorpa agus ón gComhairle an 26 Feabhra 2014 maidir le Conradh lamháltais a dhámhachtain (IO L 94, 28.3.2014, lch. 1).

- (26) Ba cheart é a bheith ar chumas oibrithe a gceart chun cosanta a fheidhmiú i gcás ina sárófar a gcearta bunaithe a bhaineann le cosaint pá íosta. Chun nach mbainfear a gcearta d'oibrithe, agus gan dochar do mhodhanna sásaimh agus réiteach díospóidí dá bhforáiltear i gcomhaontuithe comhchoiteanna, lena n-áirítear córais réitigh díospóidí chomhchoitinn, ba cheart do na Ballstáit na bearta is gá a dhéanamh chun a áirithiú go mbeidh rochtain acu ar réiteach díospóidí éifeachtach neamhchlaonta agus ceart chun sásaimh, lena n-áirítear cúiteamh leordhóthanach, agus cosaint éifeachtach ar dhochar ar bith i gcás ina gcinntíod siad a gceart chun cosanta a fheidhmiú.
- (27) Ba cheart don Choimisiún meastóireacht a dhéanamh chun bonn a chur ar fáil d'athbhreithniú ar chur chun feidhme éifeachtach na Treorach seo. Ba cheart an Chomhairle agus Parlaimint na hEorpa a chur ar an eolas faoi thorthaí an athbhreithnithe sin.
- (28) Cé gur céimeanna sa treo cheart iad na leasuithe agus na bearta arna nglacadh ag na Ballstáit chun cosaint pá íosta leordhóthanach d'oibrithe a chur chun cinn, ní leasuithe ná bearta cuimsitheacha córasacha iad. Ina theannta sin, d'fhéadfadh sé gur beag fonn a bheadh ar thíortha aonair feabhas a chur ar leordhóthanacht agus cumhdach an phá íosta de bharr na tuairime go bhféadfadh sin tionchar diúltach a imirt ar an iomaíochas maidir le costas seachtrach. Ós rud é nach féidir leis na Ballstáit cuspóirí na Treorach seo a ghnóthú go leordhóthanach agus, de bharr a bhfairsinge agus a éifeachtaí, gur fearr is féidir iad a ghnóthú ar leibhéal an Aontais, féadfaidh an tAontas bearta a ghlacadh, i gcomhréir le prionsabal na coimhdeachta a leagtar amach in Airteagal 5 den Chonradh ar an Aontas Eorpach. I gcomhréir le prionsabal na comhréireachta a leagtar amach san Airteagal sin, ní théann an Treoir seo thar a bhfuil riachtanach chun na cuspóirí sin a ghnóthú.

- (29) Leis an Treoir seo, leagtar síos ceanglais íosta, sa chaoi nach ndéantar aon athrú ar shaincheart na mBallstát forálacha níos fabhraí a thabhairt isteach nó a choinneáil. Ba cheart go mbeadh feidhm fós ag cearta a fuarthas faoin gcreat dlíthiúil náisiúnta atá ann cheana, mura rud é go dtugtar forálacha níos fabhraí isteach leis an Treoir seo. Ní féidir cur chun feidhme na Treorach seo a úsáid chun na cearta atá ann d'oibrithe san Aontais cheana a laghdú ná ní féidir é a bheith ina fhoras bailí chun leibhéal ginearálta na cosanta a thugtar d'oibrithe sna réimsí a chumhdaítear sa Treoir seo a laghdú.
- (30) I gcur chun feidhme na Treorach seo, ba cheart do na Ballstáit staonadh ó shrianta riaracháin, airgeadais agus dlíthiúla a fhorchur ar bhealach lena gcuirfí bac ar bhunú agus ar fhorbairt micrifhiontar agus fiontar beag agus meánmhéide. Dá bhrí sin, iarrtar ar na Ballstáit measúnú a dhéanamh ar an tionchar atá ag a ngníomh trasuite ar fhiontair bheaga agus mheánmhéide chun a áirithiú nach ndéanfar difear díréireach dóibh, agus aird faoi leith a thabhairt ar mhicrifhiontair agus ar an ualach riaracháin, agus torthaí na measúnuithe sin a fhoilsiú. Más rud é go ndéanfar difear díréireach do mhicrifhiontair agus fiontair bheaga agus mheánmhéide, ba cheart do na Ballstáit féachaint le bearta a dhéanamh chun tacú leis na fiontair sin a struchtúir luacha saothair a oiriúnú do na ceanglais nua.
- (31) Cuirtear an Ionstraim um Thacaíocht Theicniúil¹² agus Ciste Sóisialta na hEorpa Plus¹³ ar fáil do na Ballstáit chun gnéithe teicniúla na gcreataí pá íosta a fhorbairt nó a fheabhsú, lena n-áirítear measúnú a dhéanamh ar leordhóthanacht, faireachán agus bailiú sonraí, lena leathnaítear rochtain, agus ar fhorfheidhmiú agus ar fhothú acmhainneachta ginearálta a bhaineann le cur chun feidhme na gcreataí sin.

¹² *Togra le haghaidh Rialachán ó Pharlaimint na hEorpa agus ón gComhairle an 28 Bealtaine 2020 maidir le hIonstraim um Thacaíocht Theicniúil a leagan síos, COM(2020) 409 final*

¹³ *Togra le haghaidh Rialachán ó Pharlaimint na hEorpa agus ón gComhairle maidir le Ciste Sóisialta na hEorpa Plus, COM/2018/382 final.*

TAR ÉIS AN TREOIR SEO A GHLACADH:

CAIBIDIL I

FORÁLACHA GINEARÁLTA

Airteagal 1

Ábhar

1. D'fhoill dálaí maireachtála agus oibre san Aontas a fheabhsú, bunaítear sa Treoir seo, creat leis an méid seo a leanas **a chur chun cinn**:
 - (a) [...] leibhéil leordhóthanacha pá íosta a shocrú;
 - (b) rochtain oibrithe ar chosaint pá íosta, i bhfoirm pá a leagtar amach i gcomhaontuithe comhchoiteanna nó i bhfoirm pá íosta reachtúil, i gcás inarb ann dó.
- 1a(nua)**. Beidh an Treoir gan dochar do neamhspleáchas na gcomhpháirtithe sóisialta a urramú go hiomlán agus dá gceart chun comhaontuithe comhchoiteanna a chaibidliú agus a thabhairt i gcrích chomh maith.
2. Beidh an Treoir seo gan dochar do rogha na mBallstát pá íosta reachtúil a shocrú nó rochtain ar chosaint pá íosta arna soláthar ag comhaontuithe comhchoiteanna a chur chun cinn.
3. Ní dhéanfar rud ar bith sa Treoir seo a fhorléiriú mar ní a fhorchuireann oibleagáid
 - (a) ar na Ballstáit ina n-áirítear socrú pá go heisiach via comhaontuithe comhchoiteanna pá íosta reachtúil a thabhairt isteach,
 - (b) **ar Bhallstát** comhaontuithe comhchoiteanna a bheith infheidhme go huilíoch.

Airteagal 2

Raon feidhme

1. Tá feidhm ag an Treoir seo maidir le hoibrithe san Aontas a bhfuil conradh fostaíochta nó caidreamh fostaíochta acu mar a shainítear de réir dlí, le comhaontuithe comhchoiteanna nó leis an gcleachtas atá i bhfeidhm i ngach Ballstát, agus aird á tabhairt ar chásdlí Chúirt Bhreithiúnais an Aontais Eorpaigh.
- 2.(nua) **Féadfaidh na Ballstáit a chinneadh gan an Treoir seo a chur i bhfeidhm maidir le maraithe a gcinntear a bpá íosta leis na nósanna imeachta arna mbunú leis an gCoinbhinsiún Oibreachais Mhuirí, 2006, arna leasú.**

Airteagal 3

Sainmhínithe

Chun críocha na Treorach seo, tá feidhm ag na sainmhínithe seo a leanas:

- (1) ciallaíonn ‘pá íosta’ an luach saothair íosta a bhfuil sé de cheangal ar an bhfostóir a íoc le hoibrithe don obair arna déanamh le linn tréimhse ar leith, arna ríomh ar bhonn ama nó aschuir;
- (2) ciallaíonn ‘pá íosta reachtúil’ pá íosta arna leagan síos i ndlí, nó forálacha dlíthiúla eile atá ceangailteach ó thaobh dlí, **cé is moite díobh sin arna leagan síos i gcomhaontú comhchoiteann is infheidhme go huilíoch;**

- (3) ciallaíonn ‘cómhargáil’ an chaibidlíocht uile a tharlaíonn idir fostóir, grúpa fostóirí nó eagraíocht fostóirí amháin nó níos mó ná sin, ar thaobh amháin, agus eagraíocht oibrithe amháin nó níos mó ná sin, ar an taobh eile, chun dálaí oibre agus téarmaí fostaíochta a shocrú; agus/nó chun an caidreamh idir fostóirí agus oibrithe a rialáil; agus/nó chun an caidreamh idir fostóirí agus a n-eagraíochtaí agus eagraíocht oibrithe nó eagraíochtaí oibrithe a rialáil, **ar comhaontú comhchoiteann is rún mar thoradh air;**
- (4) ciallaíonn ‘comhaontú comhchoiteann’ gach comhaontú i scríbhinn maidir le dálaí oibre agus téarmaí fostaíochta arna dtabhairt i gcrích ag na comhpháirtithe sóisialta mar thoradh ar an gcómhargáil, **lena n-áirítear comhaontuithe dá dtugtar feidhm uilíoch;**
- (5) ciallaíonn ‘cumhdach cómhargála’ an sciar oibrithe ar an leibhéal náisiúnta a bhfuil feidhm ag comhaontú comhchoiteann ina leith; **chun an cumhdach cómhargála a ríomh, cuirfidh na Ballstáit san áireamh:**
- a) **catagóirí oibrithe a bhféadfar a ndálaí oibre, lena n-áirítear pá, a rialú le comhaontuithe comhchoiteanna i gcomhréir le dlíthe agus le cleachtais náisiúnta;**
 - b) **gach comhaontú comhchoiteann, lena n-áirítear iad sin nach bhfuil éifeacht acu ar phá.**

Airteagal 4

Cómhargáil i socrú pá a chur chun cinn

1. Agus é mar aidhm cumhdach cómhargála a mhéadú **agus chun rochtain oibrithe ar chosaint pá íosta reachtúil a fheabhsú arna soláthar ag comhaontuithe comhchoiteanna**, déanfaidh na Ballstáit, i gcomhairle leis na comhpháirtithe sóisialta **agus i gcomhréir le dlíthe agus le cleachtais náisiúnta**, na bearta seo a leanas, ar laghad:
 - (a) forbairt agus neartú inniúlacht na gcomhpháirtithe sóisialta chun dul i mbun cómhargála i socrú pá **go háirithe** ar leibhéal na hearnála agus ar an leibhéal trasteionscail a chur chun cinn;
 - (b) caibidlíocht chuimsitheach fhiúntach eolach ar phá a spreagadh idir na comhpháirtithe sóisialta.
2. Na Ballstáit inar lú an cumhdach cómhargála ná 70 % [...] bunóidh siad freisin **plean gníomhaíochta chun an chómhargáil a chur chun cinn, ina mbeidh** creat coinníollacha cumasúcháin [...], bíodh sé le dlí tar éis dul i gcomhairle leis na comhpháirtithe sóisialta nó trí chomhaontú leo. [...] Cuirfear an plean gníomhaíochta ar fáil go poiblí agus tabharfar fógra don Choimisiún Eorpach [x] mí tar éis na tréimhse trasuímh mar a leagtar amach i mír 1, d’Airteagal 17. Déanfar athbhreithniú ar an bplean gníomhaíochta [x] bliana tar éis fógra a thabhairt ina leith.

CAIBIDIL II

AN PÁ ÍOSTA REACTÚIL

Airteagal 5

Leordhóthanacht **pá íosta reactúil a chur chun cinn**

1. Na Ballstáit a bhfuil pá íosta reactúil acu, déanfaidh siad an **creat [...]** is gá **a bhunú chun** an pá íosta reactúil a shocrú agus a nuashonrú. **Déanfar an pá a shocrú agus a nuashonrú** faoi threoir na gcritéir lena gcuirtear leordhóthanacht chun cinn agus é mar aidhm dálaí cuibhiúla oibre agus maireachtála, comhtháthú sóisialta agus an cóineasú aníos a bhaint amach. Saineoidh na Ballstáit na critéir sin i gcomhréir lena gcleachtais náisiúnta, i reachtaíocht náisiúnta ábhartha, i gcinntí ó na comhlachtaí inniúla nó i gcomhaontuithe tríthaobhacha. Déanfar na critéir a shainiú ar bhealach cobhsaí soiléir.
2. Áireofar sna critéir náisiúnta dá dtagraítear i mír 1 na heilimintí seo a leanas ar a laghad, na a bhféadfaidh na Ballstáit a n-ábharthacht agus a n-ualú coibhneasta a chinneadh i gcomhréir leis na dálaí náisiúnta socheacnamaíocha atá i réim acu:
 - (a) cumhacht cheannaigh an phá íosta reactúil, agus an costas maireachtála agus ranníocaíochtaí cánacha agus sochar sóisialta á gcur san áireamh;an leibhéal ginearálta ollphá agus an chaoi a ndáiltear é;
 - (c) ráta fáis an ollphá;
 - (d) [...] **leibhéil agus forbairtí** táirgiúlachta.

3. Bainfidh na Ballstáit úsáid as luachanna tagartha táscacha chun a measúnú ar leordhóthanacht an phá íosta reachtúil i ndáil leis an leibhéal ginearálta ollphá a threorú, amhail na luachanna a úsáidtear ar an leibhéal idirnáisiúnta.
4. Déanfaidh na Ballstáit na bearta is gá chun nuashonruithe rialta tráthúla ar phá íosta reachtúil a áirithiú chun **leanúint** dá leordhóthanacht **a chur chun cinn**.
5. **Áiritheoidh** na Ballstáit go mbeidh comhlachtaí comhairleacha **ann** chun comhairle a chur ar na húdaráis inniúla maidir le saincheisteanna a bhaineann leis an bpá íosta reachtúil.

Airteagal 6

Éagsúlachtaí agus asbhaintí

I gcás ina ndéanfaidh na Ballstáit foráil do rátaí éagsúla pá íosta reachtúil i gcás grúpaí sonracha oibrithe nó do asbhaintí le dlí lena laghdaítear an luach saothair a íoctar le hoibrithe go dtí leibhéal níos ísle ná an pá íosta reachtúil, áiritheoidh siad go mbeidh na héagsúlachtaí agus na hasbhaintí sin neamh-idirdhealaitheach agus comhréireach agus go dtugann aidhm dhisteanaigh bonn cirt oibiachtúil dóibh.

Airteagal 7

Rannpháirtíocht na gcomhpháirtithe sóisialta i socrú agus nuashonrú pá íosta reachtúil

Déanfaidh na Ballstáit na bearta is gá chun **rannpháirtíocht** na gcomhpháirtithe sóisialta [...] a **éascú** ar bhealach tráthúil éifeachtach i socrú agus nuashonrú pá íosta reachtúil, lena n-áirítear trí rannpháirtíocht i gcomhlachtaí comhairleacha dá dtagraítear in Airteagal 5(5) agus go háirithe maidir leis an méid seo a leanas:

- (a) roghnú na gcritéar agus na luachanna tagartha táscacha dá dtagraítear in Airteagail 5 (1) (2) agus (3) maidir le leibhéal phá íosta reachtúil a chinneadh agus iad a chur i bhfeidhm;
- (b) na nuashonruithe ar leibhéal phá íosta reachtúil dá dtagraítear in Airteagal 5 (4);

- (c) éagsúlachtaí agus asbhaintí maidir le pá íosta reachtúil dá dtagraítear in Airteagal 6 a bhunú;
- (d) **cinntí maidir le** bailiú sonraí agus staidéir a dhéanamh mar eolas do na húdaráis um shocrú pá íosta reachtúil;

Airteagal 8

Rochtain éifeachtach oibrithe ar phá íosta reachtúil

Déanfaidh na Ballstáit, i gcomhar **nó i gcomhairle** leis na comhpháirtithe sóisialta, na bearta a leanas, **i gcás inarb iomchuí**, chun rochtain oibrithe ar chosaint pá íosta reachtúil a fheabhsú [...]:

- (1) na rialuithe agus na cigireachtaí allamuigh a dhéanfaidh na cigireachtaí saothair nó na comhlachtaí atá freagrach as creataí náisiúnta a fhorfheidhmiú, iad sin a neartú; Beidh na rialuithe agus na cigireachtaí **sin** comhréireach agus neamh-idirdhealaitheach agus déanfar leo;
- (2) treoir a fhorbairt do na húdaráis forfheidhmithe chun go ndíreofar go réamhghníomhach ar **fhostóirí** neamhchomhlíontacha agus go rachfar sa tóir orthu;
- (3) a áirithiú go gcuirfear an fhaisnéis faoi phá íosta reachtúil ar fáil go poiblí ar bhealach **cuimsitheach**, soiléir [...] so-inrochtana.

CAIBIDIL III

FORÁLACHA COTHROMÁNACHA

Airteagal 9

Soláthar poiblí

I gcomhréir le Treoracha 2014/24/AE, 2014/25/AE agus 2014/23/AE, déanfaidh na Ballstáit bearta iomchuí chun a áirithiú go gcomhlíonfaidh oibreoirí eacnamaíochta **agus a bhfochonraitheoirí na hoibleagáidí is infheidhme maidir le pá i réimse dhlí an tsaothair arna bhunú le dlí an Aontais, leis an dlí náisiúnta**, le comhaontuithe comhchoiteanna nó le **forálacha dlí idirnáisiúnta saothair [...]**, agus an soláthar poiblí nó conarthaí lamháltais á gcomhlíonadh acu.

Airteagal 10

Faireachán agus bailiú sonraí

1. Cuirfidh na Ballstáit de chúram ar a n-údaráis inniúla uirlisí bailithe sonraí éifeachtacha a fhorbairt chun faireachán a dhéanamh ar chumhdach agus leordhóthanacht an phá íosta.
2. Cuirfidh na Ballstáit na sonraí a leanas faoi bhráid an Choimisiúin ar bhonn bliantúil, roimh an 1 Deireadh Fómhair gach bliain:
 - (a) maidir leis an bpá íosta reachtúil:
 - (i) an leibhéal pá íosta reachtúil agus an sciar oibrithe a chumhdaítear leis;

- (ii) na héagsúlachtaí atá ann cheana agus an sciar oibrithe a chumhdaítear leo;
 - (iii) na hasbhaintí atá ann cheana;
 - (iv) an ráta cumhdaigh cómhargála.
- (b) maidir leis an gcosaint pá íosta a sholáthraítear ag comhaontuithe comhchoiteanna amháin:
- (i) an pá sin a dháileadh de réir deicíilí bunaithe ar sciar na n-oibrithe a chumhdaítear;
 - (ii) an ráta cumhdaigh cómhargála;
 - (iii) leibhéal an phá d'oibrithe nach bhfuil cosaint pá íosta acu a sholáthraítear le comhaontuithe comhchoiteanna agus an gaol atá aige le leibhéal an phá d'oibrithe a bhfuil an chosaint íosta sin acu.

Cuirfidh na Ballstáit na staitisticí agus an fhaisnéis dá dtagraítear sa mhír seo ar fáil, agus iad imdhealaithe de réir inscne, aoise, míchumais, mhéid na cuideachta agus earnála.

Leis an gcéad tuarascáil cumhdófar na blianta *[X, Y, Z: na 3 bliana roimh bhliain an trasuí]* agus déanfar í a sheachadadh faoin *[I Deireadh Fómhair BB: an bhliain i ndiaidh trasuite]*. Féadfaidh na Ballstáit staitisticí agus faisnéis nach raibh ar fáil roimh *[an dáta trasuite]* a fhágáil ar lár.

Féadfaidh an Coimisiún a iarraidh ar na Ballstáit tuilleadh faisnéise a sholáthar ar bhonn cás ar chás i gcás ina measfaidh sé go bhfuil an fhaisnéis sin riachtanach chun faireachán a dhéanamh ar chur i bhfeidhm éifeachtach na Treorach seo.

3. Áiritheoidh na Ballstáit go mbeidh faisnéis a bhaineann le cosaint pá íosta, lena n-áirítear comhaontuithe comhchoiteanna agus forálacha pá, trédhearcach agus go mbeidh rochtain ag an bpobal ar an bhfaisnéis sin.

4. Déanfaidh an Coimisiún measúnú ar na sonraí a tharchuirfidh na Ballstáit sna tuarascálacha dá dtagraítear i mír 2 agus déanfaidh an Coimisiún tuarascáil bhliantúil a chur faoi bhráid Pharlaimint na hEorpa agus na Comhairle.
5. Ar bhonn na tuarascála a eiseoidh an Coimisiún, déanfaidh an Coiste Fostaíochta, a bhunaítear i gcomhréir le hAirteagal 150 CFAE, scrúdú gach bliain ar chur chun cinn na cómhargála i socrú pá agus ar leordhóthanacht an phá iosta sna Ballstáit.

Airteagal 11

An ceart chun sásaimh agus cosaint ar chóir dhíobhálach nó ar iarmhairtí díobhálacha

1. Áiritheoidh na Ballstáit, gan dochar do chineálacha sonracha sásaimh agus réiteach ar dhíospóidí dá bhforáiltear, i gcás inarb infheidhme, i gcomhaontuithe comhchoiteanna, go mbeidh rochtain ag oibrithe, lena n-áirítear na hoibrithe sin a bhfuil deireadh tagtha lena gcaidreamh fostaíochta, ar réiteach éifeachtach neamhchlaonta ar dhíospóidí agus ar cheart chun sásaimh, lena n-áirítear cúiteamh leordhóthanach, i gcás sáruithe ar a gcearta a bhaineann le pá íosta reachtúil nó ar cosaint pá íosta arna soláthar ag comhaontuithe comhchoiteanna.
2. Déanfaidh na Ballstáit na bearta is gá chun oibrithe, lena n-áirítear iad sin arb ionadaithe ar oibrithe iad, a chosaint ar aon chóir dhíobhálach a dhéanfaidh fostóir nó iarmhairtí díobhálacha a thiocfaidh as gearán a chuirfear faoi bhráid an fhostóra nó as aon imeachtaí a thionscnófar chun na cearta a bhaineann leis an pá íosta reachtúil nó cosaint pá íosta arna soláthar ag comhaontuithe comhchoiteanna a chomhlíonadh, chun na cearta sin a fhorfheidhmiú.

Airteagal 12

Pionóis

Déanfaidh na Ballstáit na rialacha a bhaineann leis na pionóis is infheidhme maidir le sárúithe ar fhorálacha náisiúnta **arna nglacadh de bhun na Treorach seo nó de bhun na bhforálacha faoi seach atá i bhfeidhm cheana féin**. Beidh na pionóis dá bhforáiltear éifeachtach, comhréireach agus athchomhairleach.

CAIBIDIL IV

FORÁLACHA CRÍOCHNAITHEACHA

Airteagal 13

Cur chun feidhme

Féadfaidh na Ballstáit cur chun feidhme na Treorach seo a chur ar iontaoibh na gcomhpháirtithe sóisialta, i gcás ina ndéanfaidh na comhpháirtithe sóisialta a iarraidh go comhpháirteach go ndéanfar amhlaidh. Leis sin, déanfaidh na Ballstáit gach beart is gá chun a áirithiú go ndéanfar na **hoibleagáidí a leagtar amach** sa Treoir seo **a chomhlíonadh** i gcónaí.

Airteagal 14

Faisnéis a scaipeadh

Áiritheoidh na Ballstáit go ndéanfar na bearta náisiúnta lena dtrasuitear an Treoir seo, mar aon leis na forálacha ábhartha atá i bhfeidhm cheana agus a bhaineann leis an ábhar amhail a leagtar amach in Airteagal 1, a thabhairt ar aird d'oibrithe agus d'fhostóirí, lena n-áirítear FBManna.

Airteagal 15

Meastóireacht agus athbhreithniú

Déanfaidh an Coimisiún meastóireacht ar an Treoir laistigh de [5 bliana tar éis a dáta trasuite]. Cuirfidh an Coimisiún tuarascáil faoi bhráid Pharlaimint na hEorpa agus na Comhairle ina dhiaidh sin ina ndéanfar athbhreithniú ar chur chun feidhme na Treorach agus, i gcás inarb iomchuí, molfar leasuithe reachtacha.

Airteagal 16

Gan dul siar, agus forálacha níos fabhraí

1. Ní bheidh an Treoir seo ina foras bailí chun an leibhéal ginearálta cosanta a thugtar cheana féin d'oibrithe laistigh de na Ballstáit a laghdú.
2. Ní dhéanfaidh an Treoir seo difear do shaincheart na mBallstát dlíthe, rialúcháin nó forálacha riaracháin atá níos fabhraí d'oibrithe a chur i bhfeidhm nó a thabhairt isteach, nó spreagadh nó cead a thabhairt comhaontuithe comhchoiteanna atá níos fabhraí d'oibrithe a chur i bhfeidhm.
3. Tá an Treoir seo gan dochar d'aon [...] cheart eile a thugtar d'oibrithe trí ghníomhartha eile dlí an Aontais.

Airteagal 17

Trasuí

1. Glacfaidh na Ballstáit na bearta is gá chun an Treoir seo a chomhlíonadh laistigh de thréimhse[2 bhliain ó dháta a teachta i bhfeidhm]. Cuirfidh siad an Coimisiún ar an eolas faoi sin láithreach.

Nuair a ghlacfaidh na Ballstáit na bearta sin, beidh tagairt iontu don Treoir seo nó beidh an tagairt sin ag gabháil leo tráth a bhfoilsithe oifigiúil. Is iad na Ballstáit a chinnfidh an tslí le tagairt den sórt sin a dhéanamh.

2. Déanfaidh na Ballstáit téacs phríomhbhearta an dlí náisiúnta a ghlacfaidh siad sa réimse a chumhdaítear leis an Treoir seo a chur in iúl don Choimisiún.

Airteagal 18

Teacht i bhfeidhm

Tiocfaidh an Treoir seo i bhfeidhm an fichiú lá tar éis lá a foilsithe in *Iris Oifigiúil an Aontais Eorpaigh*.

Airteagal 19

Seolaithe

Dírítear an Treoir seo chuig na Ballstáit.

Arna dhéanamh sa Bhruiséil,

Thar ceann Pharlaimint na hEorpa
An tUachtarán

Thar ceann na Comhairle
An tUachtarán

Achoimre ón uachtaránacht ar an meastóireacht ar an Measúnú Tionchair

Measann formhór na dtoscaireachtaí gur míníodh an **comhthéacs beartais** go soiléir, ach síleann siad nach bhfuil an **bunús dlí** mínithe ach go páirteach nó nach bhfuil an míniú soiléir go leor. Is díol sásaimh do bheagnach gach Ballstát an tuairim dhlíthiúil ó Sheirbhís Dlí na Comhairle dá bhrí sin agus tá siad ag súil leis an tuairim sin. Ba mhian le roinnt Ballstát soiléirithe breise a fháil maidir leis an mbunús dlí a roghnaíodh (Airteagal 153 (1)(b) CFAE) agus maidir leis na teorainneacha a bhaineann le gníomhaíocht an Aontais a leagtar síos le hAirteagal 153 (5) CFAE.

Ní hionann an measúnú ar iomláine **shainiú na faidhbe** i ngach toscaireacht. Aontaíonn formhór na bhfreagraí go n-aithnítear sa Mheasúnú Tionchair na **bearnaí** atá san fhianaise **cheana féin**.

Measann formhór na mBallstát go léirítear go soiléir **na fadhbanna agus na bunchúiseanna**, go páirteach ar a laghad, agus go bhfuil fianaise mar bhonn taca leo. Cuireann roinnt Ballstát i bhfios go láidir, áfach, nach bhfuil an Measúnú Tionchair cuimsitheach go leor maidir le sainiúlachtaí náisiúnta amhail traidisiúin agus struchtúr eacnamaíoch, go háirithe maidir le forbairt na n-íosleibhéal pá ina gcomhthéacs náisiúnta. Thug freagróirí faoi deara freisin go bhféadfadh an bun-idirdhealú idir samhlacha náisiúnta iolrachas na struchtúr agus na réaltachta san Aontas a léiriú ar bhealach níos fearr. In ainneoin na hanailíse a cuireadh i láthair sa Mheasúnú Tionchair maidir le tionchar phaindéim COVID-19, inar thángthas ar an gconclúid go bhfuil pá íosta ríthábhachtach chun téarnamh cuimsitheach a áirithiú, ba mhian le go leor Ballstát breithniú níos fearr a dhéanamh ar thionchar na paindéime ar an ngeilleagar agus go háirithe ar FBManna.

Measann na Ballstáit go léir seachas dhá Bhallstát go leagtar amach go hiomlán soiléir, nó soiléir go pointe, **na cuspóirí beartais, lena n-áirítear aidhmeanna ginearálta agus cuspóirí níos sonraí/níos oibríochtúla**. Dar le roinnt Ballstát, áfach, d'fhéadfaí an comhfhreagras idir na cuspóirí leathana beartais agus na fadhbanna a sainaithníodh a leagan amach ar bhealach níos soiléire. Ba mhian le roinnt mhaith Ballstát tuilleadh mínithe maidir le cuspóirí sonracha, go háirithe maidir leis na cuspóirí a bhaineann le leibhéal an chumhdaigh cómhargála agus an nasc cúisíoch idir an cumhdach sin agus an méadú ar phá íosta. Luaigh formhór na mBallstát an dúshlán a bhaineann le sonraí a chur i gcomparáid le chéile toisc go n-athraíonn samhlacha socraithe pá ó thíir go tír, agus nach ionann cleachtais ghaolmhara bailithe sonraí sna Ballstáit, agus nach ann dóibh i roinnt díobh. Ba dhíol sásaimh d'fhórmhór na dtoscaireachtaí go mbeadh soiléireacht bhreise ann maidir leis na foinsí faisnéise agus na táscairí faireacháin. Ina theannta sin, maidir le **comhleanúnachas na loighce idirghabhála**, measann gach toscaireacht seachas dhá thoscaireacht go bhfreagraíonn na cuspóirí do na fadhbanna a sainaithníodh, go páirteach ar a laghad.

Tá tromlach na dtoscaireachtaí den tuairim go léirítear go soiléir go pointe áirithe ar a laghad an **gá agus an breisluach atá le gníomhaíocht an Aontais**, cé go bhfuil roinnt acu den tuairim go bhféadfaí comhsheasmhacht le prionsabal na coimhdeachta a réasúnú ar bhealach níos fearr. Bhí roinnt mhaith Ballstát den tuairim nach gcuirtear san áireamh ach go pointe áirithe, sa phlé maidir le comhréireacht na mbeart a mholtar, na héagsúlachtaí idir na samhlacha eacnamaíocha. Deir roinnt mhaith Ballstát ann nár tugadh aghaidh ach go páirteach, sa Mheasúnú Tionchair, ar ghníomhaíochtaí a rinneadh cheana nó atá beartaithe ar an leibhéal náisiúnta.

Aontaíonn formhór na mBallstát go n-aithnítear roinnt mhaith **roghanna beartais** indéanta sa Mheasúnú Tionchair, ach ba mhian le roinnt acu breithniú níos fearr ar an rogha 'Gan gníomh ar bith ón Aontas'. Measann na Ballstáit uile gur sainaithníodh na daoine/geallsealbhóirí is mó a ndéantar difear dóibh, go páirteach ar a laghad. Aontaíonn siad freisin gur cuireadh in iúl dóibh an chaoi ar cuireadh an t-ionchur ó úsáideoirí deiridh agus geallsealbhóirí i bhfeidhm sna roghanna beartais, agus thug roinnt Ballstát dá n-aire go bhféadfaí ionadaíocht níos fearr a dhéanamh ar thuairimí eagraíochtaí fostóirí sa mheasúnú tionchair. Measann roinnt Ballstát gur cheart mínithe breise a thabhairt maidir le rogha na treorach mar ionstraim dlí.

Tá gach Ballstát den tuairim go dtugtar aird sa Mheasúnú Tionchair ar **thionchar gach rogha beartais**, cé go measann formhór na mBallstát go bhféadfadh an anailís a bheith níos mionsonraithe. Chuir roinnt toscaireachtaí in iúl go bhféadfaí scrúdú breise a dhéanamh ar dhúshláin an chomhthéacs eacnamaíoch reatha, go háirithe maidir le FBManna, toisc gur dócha go mbeidh tionchar acu ar an toradh beartais. Measann gach Ballstát, seachas Ballstát amháin, go gcuirtear tionchar na roghanna beartais éagsúla in iúl, go páirteach ar a laghad, i bhformáid inchomparáide agus go gcuirtear i gcomparáid iad le tacar soiléir critéar. B'fhearr le roinnt mhaith Ballstát tuilleadh sonraí a fháil maidir leis an tionchar féideartha agus na rioscaí gaolmhara d'oibrithe ar phá íosta, tomhaltóirí, FBManna agus don iomaíochas ina gcomhthéacs náisiúnta.

Measann roinnt mhaith Ballstát gur cheart paindéim COVID-19 a chur san áireamh ar bhealach níos fearr sa Mheasúnú Tionchair agus **tionchar sóisialta** an togra á chur i láthair. Mheas gach Ballstát, seachas Ballstát amháin, go gcuirtear na tionchair shóisialta i láthair i dtéarmaí cáilíochtúla agus cainníochtaithe araon, ach ba mhian le roinnt Ballstát go dtabharfaí aird níos fearr ar rioscaí fostaíochta agus ar bhealaí eile, seachas pá, le haghaidh a thabhairt ar an mbochtaineacht. Mheas beagnach gach Ballstát go ndearnadh measúnú sa Mheasúnú Tionchair, go páirteach ar a laghad, ar chostais rialála an togra maidir le héagsúlachtaí idir samhlacha náisiúnta.

Ba mhór ag na Ballstáit gur thug an Measúnú Tionchair aghaidh, ar leibhéal éagsúla, ar **thuairim Bhord um Measúnacht Tionchair** an Choimisiúin. Maidir leis an **tomhas**, chuir roinnt toscaireachtaí chun suntais na dúshláin a bhaineann le bailiú sonraí comparáideacha agus ar an deacracht na tionchair atá beartaithe a thomhas leis na táscairí atá beartaithe. Mheas formhór na dtoscaireachtaí go raibh an **mhodheolaíocht agus na roghanna modheolaíochta** iomchuí go páirteach, **cé go bhfuil éiginnteacht** fós ann maidir le srianta cur chun feidhme sa chomhthéacs náisiúnta.